

Politiit atuuffiat pillugu inatsisip Kalaallit Nunaannut atuutilernissaanut peqqussutissatut missingiummut Kalaallit Nunaanni Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)

Saqquummiusissut

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)

Siullermeerneqarnera

Kalaallit Nunaanni inatsisinik atuutsitsinermi suliassaqarfik ukiuni kingullerni qallunaanit kalaallinillu annertuumik ukkatarineqarpoq. Qallunaat akisussaaffiini suliassaqarfitt ineriartortinneqarnissaat pillugu, matumani ullumikkumut naleqquttunngorlugu inatsisinik atuutsitsinermut suliassaqarfip nutarneqarnissaa ilanngullugu, Naalakkersuisut qallunaat naalakkersuinik suleqateqarnerisa ilaattut siunnersuut manna ilaavoq.

Kalaallit Nunaanni politiit atuuffiat pillugu inatsisip atuutsinneqalernissaanut peqqussummut – ulluinnarni politiit pillugit inatsimmik taaneqartartumut – politiit atuuffiat pillugu ullumikkumut naleqquttunik inatsisitigut tunngaveqarnissap qulakkeerneqarnissaa missingiutip massuma siunertaraa, manna aqqutigalugu nalinginnaasumik inatsisinik aalajangersakkanillu malititsiniaanermut atatillugu politiit pissaanermik atuisarnerannut pingaaruteqartumik tunngavissat aalajangersarneqassallutik.

Suliassaqarfimmi inatsisitigut maleruagassat ersarissut peqqussutikkut pilersinneqassapput, tassuunakkullu innuttaasut inatsisitigut isumannaatsuunissaat patajaallisaavigineqassaaq taassumalu peqatigisaanik pisuni politiit suliassaminnik suliarinninnerminnut atatillugu pisariaqartumik innuttaasunut akuliuttussaatillugit, pissaanermik atuisoqassappat pissaanermik atuinissamut politiit ersarissunik inatsisitigut malitassaannik tunngavilissallugit.

Innuttaasut akuleruffigineqartarerat pillugu malittarisassat atuuttut pingarnertut ingerlateqqinnejarnissaat erseqqissaavigineqarnissaallu peqqussutip anguniarpaa. Akuliussinnaanermut periarfissat atuuttut killilernissai imaluunniit annertusineqarnissai siunertarineqanngilaq.

Taamaallilluni peqqussut manna atorlugu politiit suliaat pillugit malittarisassat ersarissut aalajangersarneqarput, matumani qaqugukkut politiit akulerussinnaatitaanerat aamma pissaanermik atuisinnaanerat pillugit, kiisalu politiinut ileqqoreqqusanik suliarineqarnissaannut malittarisassat kiisalu Illersornissaqarfimmiit ikioqqusinnaanermut periarfissat ilanngullugit.

Peqqussutip aalajangersimasumik atuutilerfissaai inaarutaasumik aalajangerneqanngilaq. Peqqussummi taaguutip “politidirektør”-ip atorneqarnera tassunga pissutaavoq. Politiit pillugit aaqqissuusseqqinnej pillugu eqqartuussisarnermik inatsisip allanngortinneqarnissaa akuersissutigineqarpat, massakkut “politimester”-imik taaguuteqartitsineq taaguutip taassuma taarsissavaa.

Kisianni immikkoortut sorliit oqaluuserineqaqqaassanersut akuersissutigineqaqqaassanersullu siumut oqaatigineqareersinnaanngimmat, eqqartuussisarnermik inatsisip allannguutaa Inatsisartuni Folketing-imilu akuersissutigineqartinnagu peqqussut atuutilersinneqarsinnaanngilaq.

Naalakkersuisut taamatut oqaaseqarlutik immikkoortoq Inatsisartunut akuersaartumik oqallisigeqquillugu ingerlateqqippaat.